

四庫全書

史部

欽定四庫全書

史部

大事記續編卷二十一

詳校官檢討

臣

朱依昊

編修

臣

裴謙覆勘

總校官編修

臣

倉聖脉

校對官典簿

臣

劉景岳

謄錄監生

臣

何銓

欽定四庫全書

大事記續編卷二十一
明 王禕 撰

漢昭烈皇帝章武元年 吳王孫權元年
魏高祖文帝黃初二年

解題曰朱熹曰自古亦有無統時如周亡之後秦未
帝之前三國六朝五代天下分裂不能相君臣此謂
無統司馬光編年書止合書甲子而附年號於其下
如蜀建興年魏黃初年吳黃武年方是今按通鑑綱
目乃以劉備接漢統又似抑揚太過故用無統之例

書之

春三月魏以秘書令劉放為中書監秘書丞孫資為中

書令掌機密

以魏傳修

解題曰杜佑通典後漢尚書為機衡之任尚書郎直宿建禮門為誥令曹公為魏王置秘書令典尚書奏事則秘書之職近密尚書之職踈遠魏文改秘書為中書歷代相沿而後漢尚書郎非今之尚書郎乃中書舍人也按魏書羣臣永寧宮奏中書監令之班微

耳而得掌機事自是宰相始得以他官參掌荀勗為中書監侍中毗贊朝政張華為中書令劉卞謂其居阿衡之地殷浩為揚州刺史而參綜朝權皆此類也唐侍中尚書令中書令為真宰相其以他官參掌者則有同中書門下三品及平章事知政事參知政事參與政事之名或至十數人同時為之體統不正蓋

肇於此

朱熹曰曹操開魏王府未敢即擬朝廷建官但置秘書令不既篡漢始改為中書監

魏復五銖錢

以魏紀修

夏四月丙午漢中王備即漢帝位改

元以諸葛亮為丞相許靖為司徒立宗廟祫祭高皇以

下以蜀傳修

解題曰太傅許靖安漢將軍糜竺軍師將軍諸葛亮太常賴恭等上言今上無天子海內惶惶靡所式仰羣下前後上書者八百餘人咸稱述符瑞圖讖間黃龍見武陽赤水九日乃去又前園襄陽襄陽男子獻玉璽衍潛漢水漢者高祖本所起定天下之國號也大王襲先帝軌跡亦興於漢中也曹氏既篡主漢祚者舍先主奚屬而

羣臣勸疏稱說符瑞反覆詳復儼如光武即位之時甚矣貽謀之不可不謹也 伏惟大王出

自孝景皇帝中山靖王之胄本枝百世宜即帝位以

纂二祖紹嗣昭穆前部司馬費詩上疏曰殿下以曹

操父子偏主篡位故乃羈旅萬里糾合士衆將以討

賊今大敵未克而自立恐人心疑惑昔高祖與楚約

先破秦者王及已入關猶逡巡不敢當况今殿下未

出門庭耶由是忤指

時中夏人情未一聞備在蜀四方延頸而備銳意即真劉巴以

為如此示天下不廣且欲緩之與主薄雍茂諫備以他事殺茂呂祖謙曰費詩之議不達時變漢統既絕

昭烈安得不承之餘見通鑑裴松之曰先主雖云出
非高祖之時比也

自孝景而世數悠遠昭穆難明既紹漢祚不知以何
帝為元祖以立親廟於時英賢作輔儒生在官宗廟
制度必有憲章而載記闕略良可恨哉

孫權徙都武昌

以通鑑
目錄修

五月漢主立夫人吳氏為皇后

子禪為皇太子

以蜀
傳修

解題曰劉瑁納后瑁死后寡居羣下勸先主聘后先
主疑與瑁同族法正進曰論其親疎何與晉文之於

子圉乎於是納為夫人習鑿齒曰婚姻人倫之始王
化之本匹夫猶不可以無禮況人君乎晉文廢禮行
權以濟其業非無故而違禮教者也先主無權事之
偏而引前失以為譬非導其君以堯舜之道者從之
過矣

吳立子登為太子

以吳
書修

解題曰按吳立登為太子選置師傅銓簡賓友於是
諸葛恪張休顧譚陳表等入侍講詩書出從騎射登

與恪等或同輿而載或共帳而寐登為皇太子恪為
左輔休為右弼譚為輔正表為翼正東宮號為多士
史記楚子熊繹魯公伯禽衛康叔子平齊太公子伋
俱事成王權用諸葛張顧諸賢侍太子蓋有得於三
代之意矣餘見通鑑

六月甲辰魏祀太祖於建始殿如家人禮

以魏傳修

解題曰以宗廟未成躬執饋奠如家人之禮

丁卯魏殺夫人甄氏

以通鑑修

戊辰晦日有食之魏詔勿劾

三公

以魏紀修

漢車騎將軍張飛為其下所殺

以蜀傳修

秋七月漢

主帥師擊孫權權請和不許和以將軍陸遜為大都督

拒之

以通鑑修

魏築凌雲臺

以通鑑修

八月孫權稱臣於魏歸于

禁等丁巳魏封權為吳王加九錫

以通鑑目錄修

解題曰魏略孫權聞魏受禪備稱帝乃呼問知星者

已分野中星氣何如遂有僭意而以位次尚少無以

威衆又欲先卑而後踞之為卑則可以假寵後踞則

必致討然後可以怒衆衆怒然後可以自大故深絕

蜀而專事魏餘見通鑑

吳城武昌

以吳傳修

冬十月魏罷五銖錢

朱熹綱目

十一月魏遣

使求香犀珠貝於吳

以呂祖謙標目修

時烏桓浸衰鮮卑強盛

魏置護鮮卑烏桓二校尉

以呂祖謙標目修

漢昭烈皇帝章武二年 吳王黃武元年 魏高祖文皇帝黃初三年

春正月丙寅

朔日有食之

魏紀

魏詔選士不限年

以通鑑目錄修

二月魏復通

西域

以呂祖謙標目修

漢主進軍夷道獠亭使將軍黃權督江

北軍

以蜀傳修

閏六月陸遜大破漢軍漢主走吳以遜領荊州牧

以蜀吳傳修

解題曰遜遣將軍李異謝旌等將三十人攻蜀將庾晏陳鳳異將水軍旌將步兵斷絕險要即破晏等生降得鳳文攻房陵太守鄧輔南鄉太守郭睦大破之秭歸大姓文布鄧凱等合夷兵數千人首尾西方遜復部旌討破布凱前後斬獲招納凡數萬計諸葛亮與尚書令法正好尚不同以公相取亮每奇正智術漢主將東征孫權臣多諫不從大軍敗績還住白帝

亮歎曰孝直若在則能制主上令不東行就復東行
必不傾危矣餘見通鑑朱熹曰先主東征孔明畧不
見之議論事敗之後方追恨孝直之不在得君如孔
明猶有不能盡言者乎

秋八月黃權降魏

以通鑑修

九月甲午魏詔群臣不得奏事

太后后族不得輔政

以魏紀修

十一月庚申晦日有食之春

二月魏軍還三月漢主召諸葛亮與尚書令李平受遺

夏四月殂于永安宮五月太子禪即皇帝位尊皇后曰皇

太后改元封亮為武鄉侯領益州牧

以蜀傳修

解題曰先主病篤召亮於成都屬以後事謂亮曰若嗣子可輔輔之如其不才君可自取亮涕泣曰臣敢不竭股肱之力效忠貞之節繼之以死遺詔勅後主曰人五十不稱夭年已六十有餘何所復恨不復自傷但以卿兄弟為念勉之勿以惡小而為之勿以善小而不為惟賢惟德能服於人汝父德薄勿效之可

讀漢書禮記閒暇歷觀諸子及六韜商君書

先主師友學問後世

帝王鮮及然臨終教太子讀書之法益人意智聞丞
不及論語經書其本領欠闊多矣

相為寫申韓管子六通

亮嘗自比管樂其所學亦於此可見

已畢未送

可自更求聞達臨終呼魯王與語吾亡之後汝兄弟

父事丞相今卿與丞相共事而已亮上言於後主曰

遺詔事惟太宗動容損益百寮發哀滿三日除服到

喪期復如禮其郡國太守相都尉縣令長三日便除

服臣請宣下奉行

永安宮在夔州

餘見通鑑

張拭曰亮之於學為未足者知

有未至也知有未至則心為未盡未能盡其心則於
天下之事物有所不能備該而一以貫之也聞國建

后大事也而奉冊所立者乃亡國之宗婦以日易月
後世之大失也而冢宰所贊者乃因繆之禮茲可見
其學之未至歟

陳壽評曰先主之強毅寬厚知人待士蓋有
高祖之風英雄之氣焉及其舉國託孤於諸葛亮而

心神無貳

葉適曰道得出司
馬遷不能過也

誠君臣之至公古今之

盛軌也機權幹略不逮魏武是以基宇亦狹然折而
不撓終不為下者抑揆彼之量必不容己非唯競利
且以避害云爾又曰禮國君繼體踰年改元而章武
之三年則革稱建興考之古義體禮為遠又國不置

史注記無官是以行事多遺灾異靡書諸葛亮雖達

於為政凡此之類猶有未周焉

胡寅曰或謂昭烈知禪不才不能保孔明

之必與禪也故於臨終正言英亮德已而不忍取嗚呼可謂以小人之腹度君子之心矣玄德磊磊落落與孔明兼君臣師友之契三代已還未見其比夫豈以欺詐相待如市道之為乎曹操名為英雄攷其心事乃真小人爾雖暴戾強伉殺人不忌至其病亡伊嬰涕泣留連妾婦平生姦偽死乃盡見方之玄德治命無一語及私其相去豈不遠哉玄德天資既高克己亦力其從鄭康成盧植學問弘益多矣

六月漢益州耆帥雍闓反

以通鑑修

秋九月漢尚書鄧芝聘

吳吳遂絕魏

以通鑑修

解題曰亮遣使聘吳因結和親遂為與國亮集曰是
歲魏司徒華歆司空王朗等各有書與亮陳天命人
事欲使舉國稱藩亮不報書作正議曰世祖創迹舊
基奮羸卒數千摧莽強旅四十餘萬於昆陽之郊夫
據道討淫不在衆寡軍誠曰萬人必死橫行天下昔
軒轅整卒數萬制四方定海內況以數十萬之衆據
正道而臨有罪可得干擬者哉餘見通鑑

是歲漢立妃張氏為皇后

以通鑑修

魏徵處士管寧為太中

大夫不受

以魏傳修

漢安樂忠公建興二年

吳王黃武三年

夏四月魏立

魏高祖文皇帝黃初五年

太學

以舉要歷補遺修

吳輔義中郎將張溫聘漢

以吳傳修

秋七月

魏主如許昌八月以舟師伐吳九月至廣陵而還

以魏紀吳

修傳

解題曰魏文帝出廣陵吳人臨江孫權令趙達筭之

達曰曹丕走矣然吳衰庚子計五十八年權曰今日之憂

不暇及子孫觀權此言豈有混一之志哉餘見通鑑

吳殺尚書暨艷卽徐彪廢張溫

以通鑑修

解題曰

暨音揭

將軍駱統表理張溫曰溫洪雅之素英

秀之德文章之采論溫才則可惜言罪則可恕權不
納餘見通鑑宋祁曰曹操忌孔融崔琰殺之操之宇
為弗裕矣孫權引殺融為比而斥虞翻誅張溫權之
量又下矣待賢少忌唯劉備為綽綽

冬十一月戊申晦日有食之

以通鑑修

漢安樂思公建興三年

吳王黃武四年

春三月魏并

州刺史梁習討鮮卑軻比能大破之

以魏紀修

漢諸葛亮討

雍闓

以蜀傳修

魏主為舟師夏五月戊申至譙

以魏紀通鑑修

六月

吳以太常顧雍為丞相

以吳傳修

解題曰初權當置丞相衆議歸張昭權曰方今多事職

大者責重非所以優之也孫邵卒百寮復舉昭權曰孤

豈為子布有愛顧丞相事煩而此公性剛所言不從怨

咎將興非所以益之也乃用雍餘見通鑑陳亮曰昔吳

起與田文論功至主少國疑大臣未親百姓未附之際

吳起屈馬桓王屬大皇於張昭更以周瑜遺之後瑜驅馳於顛危之際昭遂廢不用何哉江東雖定而國輕矣

秋七月諸葛亮平雍闓

以蜀傳修

解題曰益州永昌牂柯越雋南中四郡皆平南中蓋昔夷越之地滇濮句町夜郎榆葉桐師舊堂侯王國以十數益州故滇池國今姚州之地漢武帝置郡東漢明帝分置永昌郡古哀牢國也牂柯故且蘭今珍承秦費西高州之地漢武帝置郡越雋今黎雅敘三州及姚

雋州之地漢武帝置郡亮平四郡改益州為建寧郡

別立益州郡後改為晉寧郡分建寧越雋置雲南郡

又分建寧牂牁置興古郡事見通鑑

魏了翁曰瀘水始於西南徼外

吐蕃之地曲羅東下三百里又東注於三重瀘又東為西瀘水縣又東北會孫水雋水又北會大渡水其支分為朱提水若水芋官水浞水淹水咸會於越雋郡之馬湖縣由東北至楚道縣入江諸葛道所從出

冬十月魏主至廣陵而還

以魏紀修

十二月吳都陽賊彭綺反

以吳傳修

漢安樂思公建興四年魏高祖文皇帝黃初七年

吳王黃武五年

夏四月魏殺

治書執法鮑勛

以呂祖謙標目修

五月魏立子平原王叡為皇

太子丙辰召中軍大將軍曹真鎮軍大將軍陳群征東
大將軍曹休撫軍大將軍司馬懿受遺輔政丁巳魏主
殂太子叡即皇帝位尊皇太后曰太皇太后皇后曰皇
太后追謚甄夫人曰文昭皇后

以魏
紀修

解題曰按晉書本紀懿內忌而外寬猜忌多權變魏
武察懿有雄豪志聞有狼顧相欲驗之乃召使行前
令反顧面正後而身不動因謂太子丕曰司馬懿非
人臣也必預汝家事太子素與懿善每相全佑故免

懿於是勤於吏職夜以忘寢至於芻牧之間悉皆臨履由是魏武意遂安餘見通鑑天之禍敗人之國家也豈人之所能為哉以魏武之猜雄逆睹司馬不臣之迹伊嚶以告其子而不故忘之擁護全佑任之託孤於是懿窺伺間便忽起而搯其吭曹氏不血食矣味孟子反爾之言察老氏好還之戒天實為之於丕

何尤哉

蕭方三十國春秋魏武王為司空辟高祖高祖以漢祚將衰不欲屈節曹氏辭以風痺不

能起居武王使往微伺之高祖卧不動又遣親信令史微服於高祖門外樹陰下息時七月七日高祖曝

書令史竊知與相聞求共飲避暑遂坐談園綦殺雞
為餅令史還具說重辟之制行者曰若復不就便可
叔之高祖懼而應命乃共談軍國之務盡日乃出又
云高祖辭以風痺不能起居曝書遇雨高祖收書惟
一婢見高祖起懼言語洩漏張夫人乃手殺婢而自
執囊馬令晉書帝紀列傳本此稍加隱括夫惟婢見
其起則不應為令史所知令史既知之則所見不止
一婢自相抵牾懿齒少名微豈為異日雄豪之地魏
武何所見而遠憚之至此殆史臣及當時佞諛
者誇其素美遂至千辭以述耳未必有此事也

秋八月吳王權攻魏江夏遣將圍石陽尋退

以吳傳修

解題曰自是吳之有事于魏東不出合肥壽春西不
過襄陽江夏而已殷札嘗請權大舉謂若不悉軍動衆循

前輕舉則民疲威消時往力竭彼蓋知之矣餘見通鑑
春正月吳獲彭綺三月漢下詔伐魏諸葛亮屯漢中

解題曰亮上疏曰先帝創業未半而中道崩殂今天
下三分益州疲弊此誠危急存亡之秋也然侍衛之臣
不懈於內忠良之士立身於外者蓋追先帝之殊遇欲報
之於陛下也誠宜開張聖德以光先帝遺德恢弘志士
之氣不宜妄自菲薄引喻以塞忠諫之路也宮中府中
俱為一體陟罰臧否不宜異同若有作姦犯科及為忠善者宜

付有司論其刑賞以昭陛下平明之理不宜偏私使

內外異法也侍中郭攸之費禕侍郎董允等

攸之南陽人廖

立謂李邵等曰中郎郭演長從人者耳不足與經大事而作侍中蓋指攸之也

此皆良實志

慮忠純是以先帝簡拔以遺陛下愚以為宮中之事

事無大小悉以咨之然後施行必能裨補闕漏有所

廣益

案允傳亮慮后主富於春秋朱紫難別以允秉心公亮欲任以宮省之事攸之性素和順脩員

而已獻納之任允皆專之甚盡匡救之理後主常欲采擇以充後宮允以為嬪嬙已具不宜增益終執不

聽後主益嚴憚之

將軍向寵性行淑均曉暢軍事試用於昔

日先帝稱之曰能是以衆議舉寵為督

寵為牙門將
裨歸之敗寵

營持完後為中
郎督典宿衛兵

愚以為營中之事悉以咨之必能使

行陳和睦優劣得所親賢臣遠小人此先漢所以興

隆也親小人遠賢臣此後漢所以傾頽也先帝在時

每與臣論此事未嘗不歎息痛恨於桓靈也侍中尚

書長史參軍此悉貞良死節之臣願陛下親之信之

則漢室之隆可計日而待也

亮於郭攸之費禪董允
則曰良實忠純於向寵

則曰性行淑均於長史參軍則曰貞良死節之臣至
於智謀變詐宕蕩之士皆所不取蓋良實忠純則誠

於報國而不涉於虛誕均淑則公於謀國而不涉於偏黨端良而有敢死之節則忠勇奮發而無避事之嫌亮之取人亦異乎後世所取笑臣本布衣躬耕南陽苟全性命於

亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之務由是感激遂許先帝以驅馳後值傾覆受任於敗軍之際奉命於危難之間爾來二十有一年矣先帝知臣謹慎故臨崩

寄臣以大事也受命已來夙夜憂歎恐付託不效以傷先帝之明故五月渡瀘深入不毛

案瀘州瀘川縣有瀘岸高三千

丈地多瘴氣三四經之必死五月則無害

今南方已定兵甲已足當獎率

三軍北定中原庶竭駑鈍攘除姦凶興復漢室還於舊

都此臣所以報先帝而忠陛下之職分也至於斟酌

損益進盡忠言則攸之禕允之任也願陛下託臣以

討賊興復之效不效則治臣之罪以告先帝之靈若無興德

之言責攸之禕允等之慢以彰其咎陛下亦宜自謀以諮諏

善道察納雅言深追先帝遺詔臣不勝受恩感激今

當遠離臨表涕零不知所言

蘇軾日出師表簡而盡直而不肆與伊訓說命

表裏亮謀取益州日月之食也至是則人皆仰之不
復論前事矣陳亮曰初漢置御史大夫下丞相一等
其後武帝游宴後庭侍中中書令多以宦者為之成
帝始更用士人中興雖置三公而臺閣專國命矣昭
烈在蜀國政歸丞相其侍中中書令尚書令有所謂
僕射黃門侍郎者更為輔導天子之官諸葛亮以大
公之道一整紀綱明白洞達民用其情方連歲出師
而平世之文未遑具舉是以條章多闕非獨記註之
失也論者稱其兵出之日天下震動而人心不憂死
生成敗要何足論王者之不作天猶以為未踈哉

夏四月乙亥魏復行五銖錢

以通鑑修

解題曰葉適曰黃初五銖錢未幾以穀貴罷至是始
復行然則建安中物踊但用穀帛非若王莽日改幣

而禁挾錢也幣與物相權從古而然雖操猜詐百出

不敢用異說後世以有限逐無涯自坐窮處遂無策矣

甲申魏初營洛陽宗廟

以魏紀修

冬十一月魏立貴嬪毛氏

為皇后

以魏紀修

十二月孟達復降漢魏都督荊豫州軍事

司馬懿帥師襲之

以魏紀修

解題曰降人李鴻詣諸葛亮曰間過孟達許適見王

冲從南來言明公切齒於達欲誅達妻子賴先主不

聽耳達曰諸葛亮見顧有本末終不爾也不信冲言

委仰明公無復已已亮欲誘達以為外援與達書達得書數相交通辭欲叛魏魏遣司馬懿征之即斬滅達亮亦以達無款誠之心故不救助也餘見通鑑

漢安樂思公建興六年魏烈祖明皇帝太和二年

吳王黃武七年

春正月魏平

孟達

以通鑑修

漢諸葛亮出祁山降天水南安安定魏遣大

將軍曹真禦之二月魏主如長安亮參軍馬謖與魏將

軍張郃戰於街亭敗績亮誅謖自貶為右將軍

以蜀傳通鑑修

解題曰夏侯楙鎮長安亮於南鄭與羣下計議督前

部領丞相司馬魏延曰聞夏侯楙少主婿也怯而無

謀

魏畧曰楙為安西將軍持節承夏侯淵處都督關中性無武畧而好治生多畜伎妾

今假延

精兵五千直從褒中循秦嶺而東當子午而北

子午谷在

長安萬年縣出洋川真符縣北魏張郃攻漢中劉欽伐蜀晉司馬勲伐秦皆出入子午道

不過十

日可到長安楙聞延奄至必乘船逃走長安中惟有

御史京兆太守耳橫門邸閣與散民之穀足周食也

比東方相合聚尚二十許日而公從斜谷來必足以

達如此則一舉而咸陽以西可定矣亮以為此縣危

不如安從坦道可以平取隴右十全必克而無虞故

不用延計

從魏李苗每請蜀書見魏延請出長安諸葛不許歎息謂亮無奇計苗本足以語此

也亮揚聲由斜谷道取郿

郿縣屬鳳翔府當斜谷口

使趙雲鄧芝

為疑軍據箕谷

在鳳翔府寶雞縣東南

魏大將軍曹真舉衆拒

之

曹操經營四方多躬臨之操死而曹真曹仁曹休之徒接跡受事故不敢委之他人也

亮率

諸軍攻祁山

在今西和州長道縣東十里水經注漢陽西南有祁山九州之名阻天下之奇

峻

戎陣整齊賞罰肅而號令明南安

今鞏州之地

天水安

定叛魏應亮關中響應魏帝西鎮長安命張郃拒亮

亮使參軍馬謖督諸軍在前

張拭曰謖議論與孔明器相似其才非不可用

置之帷幄則可為將帥則違其才孔明使之為前鋒不能無小差

與郤戰於街亭

在秦

州隴城縣東北六十里俗名漢街城

謖違亮節度依阻南山不下據城

郤絕其汲道擊大破之亮拔西縣千餘家虜姜維還

於漢中

漢隴西郡西縣在今秦州清水縣今興元府西縣有諸葛亮城蓋亮還漢中築此以處之

蜀人皆賀亮亮顏色愀然有戚容謝曰普天之下莫

非漢氏國家威力未舉使百姓困於豺狼之吻一夫

有死皆亮之罪以此相賀能不為愧

觀此數語亮真可為王者之位

矣趙雲鄧芝兵弱敵強失於箕谷然欽衆固守不至

大敗

水經注褒水西北出衙嶺山東南逕大石門歷故棧道下谷諸葛亮與瑾書云趙子龍退軍燒

壞赤崖以北間道緣谷一百餘里又云子龍伯苗一戍赤崖屯田一戍崖口但得緣崖與伯苗相聞而已

戮謾以謝衆上疏曰臣以弱才叨竊非據不能訓章

明法臨事而懼至有街亭違命之關箕谷不戒之失

咎皆在臣授任無方臣明不知人卹事多闇春秋責

帥臣職是當請自貶三等以督厥咎餘見通鑑

或問亮始

出隴右南安天水安定應之若連進則三郡非中國之有也而亮徐行不進既而官兵上隴三郡復反亮

失此機何也表曉曰蜀兵輕銳良將少亮始出未知中國強弱是以嘗而疑之且大會者不求近功所以不進也曰何以知其疑也曰亮勇而能關三郡反而不速應此其疑微也曰何以知其勇而能關曰亮之在街亭也前軍大破亮屯去數里不救官兵相接又徐行此其勇也亮之行軍安靜而堅重安靜則易動堅重則可以進退亮法令明賞罰信士卒用命赴險而不顧此所以能關也

夏吳鄱陽太守周魴誘魏揚州牧曹休向皖秋八月吳

王權至皖以陸遜為大都督大破休於石亭

以魏紀吳傳修

解題曰曹休將步騎十萬至皖城以迎魴時吳以陸遜為元帥全琮朱桓為左右督各督三萬人擊休休

知見欺當引軍還自負衆盛邀於一戰桓進計曰休

本以親戚見任非智勇名將也今戰必敗敗必走當

由夾石挂車

夾石在今安慶府桐城縣挂車鎮在其西

此兩道皆險阨若

以萬兵柴路則彼衆可盡而休可生虜臣請將所部

以斷之若蒙天威得以休自效便可乘勝長驅進取

壽春割有淮南以規許洛此萬世一時不可失也權

先與陸遜議遜以為不可不施行遜自為中部朱桓

全琮為左右翼三道俱進果衝休伏兵因驅走之追

亡逐北徑至夾石斬獲萬餘牛馬騾驢車乘萬兩軍
資器械畧盡魏豫州刺史賈逵與休合進度休深入
必敗乃部署諸將水陸並進行二百里得生賊言休
戰敗權遣兵斷夾石諸將不知所為或欲待後軍逵
兼道進軍多設旗鼓為疑兵吳軍遂退逵據夾石以
兵糧給休休軍乃振餘見通鑑此一役也吳可以大
得志而固失之豈陸遜耻其謀之不已出而致然歟
推此心以往其害事大矣

石亭在今安慶府皖口

冬十二月漢諸葛亮出散關圍魏陳倉不克退斬魏追

將王雙

以通鑑修

解題曰亮聞孫權破曹休魏兵東下關中虛弱上言
曰先帝慮漢賊不兩立王業不偏安故託臣以討賊
也以先帝之明量臣之才故知臣伐賊才弱敵強也
然不伐賊王業亦亡惟坐而待亡孰與伐之是故託
臣而弗疑也臣受命之日寢不安席食不甘味思惟
北征宜先入南故五月渡瀘深入不毛并日而食臣

非不自惜也顧王業不可得偏全於蜀故冒危難以奉先帝之遺意也而議者謂為非計今賊適疲於西又務於東兵法乘勞此進趨之時也夫難平者事也昔先帝敗軍於楚當此時曹操拊手謂天下已定然後先帝東連吳越西取巴蜀舉兵北征夏侯授首此操之失計而漢事將成也然後吳更違盟關羽毀敗秭歸蹉跌曹丕稱帝凡事如是難可逆見臣鞠躬盡力死而後已至於成敗利鈍非臣之愚所能逆睹也

張栻曰三代衰五霸起而功利之說盈天下謀國者不復知正誼明道之為貴三老董公獨得宏綱以告漢高帝猶未能盡其用也孔明當漢祚之季乃能執其機而用之其言曰漢賊不兩立臣鞠躬盡力死而後已此夏少康四十年經營宗祀而卒以配天之本心也孔明

可謂有正大之體矣餘見通鑑

鳳翔府寶雞縣有陳倉故城大散關在寶雞縣西

魏遼東太守公孫恭兄子淵篡恭自立

以魏紀修

漢安樂思公建興七年

吳大皇帝黃龍元年

春漢諸

魏烈祖明皇帝太和三年

葛亮遣將定魏武都陰平二郡復為丞相

以蜀傳通鑑修

解題曰陰平今文龍州之地

夏四月丙申吳王權即皇帝位改元追尊考妣為帝后

立王太子登為皇太子

以吳書修

解題曰宋庠紀年通譜改元以協瑞黃龍本漢宣帝號再用舊元始於此

六月漢遣衛尉陳震使吳吳主與盟約中分天下

以吳蜀列

修傳

解題曰豫青徐幽屬吳兗冀并涼屬魏其司州之土

以函谷關為界杜佑通典魏據中原有州十二司隸

荆豫兗青徐涼秦冀幽并揚雍有郡國六十八東自

廣陵壽春合肥沔口

建安十五年文聘為太守吳頻攻不拔青龍後屬吳即漢陽軍

西陽

黃初中滿寵今將守之

襄陽重兵以備吳西自隴西南安

祁山漢陽陳倉

諸葛亮攻陳倉不拔縣東二十里故城

重兵以備蜀

主全制巴蜀置益梁二州有郡二十二以漢中興勢

白帝為重鎮吳主北據江南盡海置交廣荆郢揚五

州有郡四十有三以建平

黃武初破蜀後得之

西陵樂鄉

建衡三年

陸抗築

武昌皖城

皖音患

牛渚圻

天紀末何植守之

濡須並為重

鎮其後得沔口

嘉禾後陸遜諸葛瑾屯守

邾城

今齊安郡東西界臨江與武昌對

廣陵

魏主追尊高祖考妣為帝后

以魏紀修

秋七月魏詔後嗣由

諸侯入奉大統者不得顧私親

以通鑑修

九月吳遷都建業

使上大將軍陸遜輔太子登於武昌

以吳傳修

解題曰按江表傳初權在武昌欲遷都建業而慮水

道沂流二千里一旦有警不相赴及以此懷疑及至
夏口大會百官議之或陳宜立柵於夏口或言宜重
設鐵鎖權皆以為非計張梁為小將越席而進曰今
宜明樹賞罰之信遣將入沔與敵爭利形勢既成彼
不敢干也使武昌有精兵萬人付智略者任將常使
嚴整一旦有警應聲相赴作甘水城輕艦數十諸所
宜用皆使備具如此開門延敵敵自不來矣權以梁
計為得權大會將相文武特謂嚴峻曰孤昔歎魯子

敬比鄧禹呂子衡方吳漢聞卿諸人未平此論今定云何峻退席曰臣未解指趣權曰昔鄧仲華初見光武時受更始使撫河北耳未有帝王之志也禹勸之以復漢業是禹開初議之端矣子敬英爽有殊略孤與一語便及大計與禹稍似呂子衡忠篤亮直性雖如奢然以憂公為先不足為損避袁術自歸於兄兄作大將別領部曲故憂兄事乞為都督辦護修整加之恪勤與漢相類皆有指趣非孤私之也峻乃服

冬十月魏置聽訟觀又詔司空陳羣等刪律

以魏紀
傳修

解題曰肉刑之議陳羣父子發之也自曹操以來屢
議施行特迫於軍事不果耳今因衛覲之請刪約漢
律而使羣輩尸其事不知所謂於正律為增於旁章
科令為省者果得聖主制刑之意否耶至晉而又定
律矣事見通鑑

十一月魏宗廟成迎主於鄴

以魏紀
修

解題曰裴松之曰按黃初四年有司奏立二廟太皇

帝大長秋與文帝之高祖共一廟特立武帝廟百世不毀今此無高祖神主蓋以親盡毀也此則魏初唯立親廟祀四室而已至景初元年始定七廟之制

十一月漢築漢樂二城

以通鑑修

解題曰通鑑築漢城於沔陽樂城於成固今興元府成固縣蜀曰樂城有南北城相對興元府西縣即古沔陽有西樂城周三十里常璩華陽國志蜀以沔陽為漢城城固為樂城史容曰漢樂二城皆在成固故

沔陽自號西樂城

魏黃門侍郎杜恕論刺史不宜領兵

以魏傳修

解題曰時公卿以下大議損益恕以為古之刺史奉宣六條以清淨為名威風著稱今可勿令領兵以專民事俄而鎮北將軍呂昭又領冀州乃上疏曰大魏奄有十州之地而承喪亂之弊計其戶口不如往昔一州之民今荆揚青徐幽并雍涼緣邊諸州皆有兵矣其所恃內充府庫外制四夷者惟充豫司冀而已

臣前以州郡典兵則專心軍功不勤民事宜別置將
守以盡治理之務而陛下復以冀州寵秩呂昭冀州
戶口最多墾闢又有桑棗之饒國家徵求之府誠不
當復任以兵事也夫天下猶人之體腹心充滿四支
雖病終無大患今充豫司冀亦天下之腹心也實願
四州之牧守獨修務本之業以堪四支之重司馬懿為曹操
主簿以為天下土崩之勢由郡國無寇行習戰之備
故也可令州郡並置兵外備四夷內威不軌杜佑曰
曰晉太康中都督知軍事刺史治民各用人惠帝末乃并任非要州則單為刺史

漢安樂思公建興八年 吳大皇帝黃龍二年 春正月
魏烈祖明皇帝太和四年

吳遣將浮海求夷洲 亶洲陸遜等諫不聽

以吳傳修

解題曰浮海求夷洲 亶洲求馬遼東求珠崖儋耳吳

之勢亦有所局矣

後漢東夷傳會稽海外有夷州及亶洲傳言秦始皇遣徐福將童男

女入海求蓬萊神仙不得徐福遂止此洲沈
臺臨海水土志夷州在臨海東南二千里

二月魏立郎吏課試法尚書諸葛誕中書郎鄧颺等以

浮誕免官

以通鑑修

夏六月戊子魏太皇太后殂

以魏紀修

秋七

月魏大司馬曹真大將軍司馬懿伐漢漢諸葛亮待之

於成固赤阪九月真等還

以魏紀
蜀傳修

解題曰魏使司馬懿由西城張郃由子午曹真由斜
谷欲攻漢中諸葛亮待之於成固赤坂餘見通鑑按
通典洋州西鄉興道洋源縣皆漢成固縣地非今興
元府成固也赤坂在今洋州東龍亭山當子午谷路
是歲漢督前部魏延破魏雍州刺史郭淮於陽谿

以蜀
傳修

吳五谿蠻叛

以通
鑑修

漢安樂思公建興九年

魏烈祖明皇帝太和五年

春

吳大皇帝黃龍三年

二月吳使太常潘濬討叛蠻

以通鑑修

漢諸葛亮圍祁山魏

司馬懿救之夏五月亮敗之於鹵城六月引退殺魏追

將張郃

以魏紀蜀傳通鑑修

解題曰按漢晉春秋懿畱精甲四千守上邽餘衆悉

出西救祁山亮分兵畱攻自逆懿於上邽郭淮費曜

等邀亮亮破之與懿遇於上邽之東

元和郡縣志縣東有司馬宣王

壘諸葛壘斂軍依險軍不得交亮引還懿尋亮至於鹵城

又登山掘營不肯戰賈詡魏平數請戰因曰公畏蜀

如猛虎奈天下笑何懿病之五月辛巳乃使張郃攻
無當監何平於南園自按中道向亮亮使魏延高翔
吳班赴拒大破之懿還保營又按魏畧亮軍退懿使
張郃追之郃曰軍法歸軍勿追懿不聽郃不得已遂

進蜀軍乘高布伏弓弩亂發矢中郃髀餘見通鑑

按晉

書宣帝紀懿進軍陰麋亮聞大軍且至乃自帥衆將
芟上邽之麥衆將皆懼懿曰亮慮多決少必安營自
固然後芟麥吾得二日兼行足矣於是卷甲晨夜趨
之亮望塵而遁懿曰吾倍疲勞此曉兵者之所貪也
亮不敢據渭水此易與耳進次漢陽與亮相遇懿列
陣以待之使將牛金輕騎餌之兵才接而亮退追至

初山亮屯鹵城據南北二山斷水為重圍懿攻拔其圍亮再出初山一攻陳倉挫衄而反縱其復出不復攻城當求野戰必在隴東不在西也亮每以糧少為恨歸必積穀以吾料之不三稔不能動矣此皆因亮兵之開闔大言以詭其下耳作史者殆未之知也史容曰初山在西和州長道縣鹵城與之相近

秋魏東阿王植上疏詔寬諸侯王法禁

以通鑑修

解題曰植上疏詔報曰蓋教化所由各有隆敝非皆善始而惡終也勢使之然故忠厚仁及草木則行葦之詩作恩澤哀薄不親九族則角弓之章刺今令諸國兄弟情禮簡怠妃妾之家膏沐疏畧朕縱不能敦

而睦之王援古喻義備悉矣何言精誠不足以感通哉夫明貴賤宗親親禮賢良順少長國之綱紀本無禁錮諸國通問之詔也矯枉過正下吏懼譴以至於此耳已敕有司如王所訴植復上疏陳審舉之義帝復優答報餘見通鑑

八月漢徙中都護李平於梓潼

以蜀傳修

解題曰張栻曰正觀政要載孔明語云吾心如秤不能為人作輕重此真孔明語也觀廖立李平之事可

見矣事見通鑑

冬十月吳使人誘魏揚州刺史王凌敗其兵

以通鑑修

十一

月戊戌晦日有食之

魏紀

十二月丁卯吳改明年元

以三國志

吳傳

漢安樂思公建興十年

魏烈祖明皇帝太和六年

春

吳大皇帝嘉禾元年

正月吳太子登還建康

以通鑑修

二月魏詔諸侯王以郡為

國

以通鑑修

解題曰蓋因東阿王之疏而為之者也王師古曰此

詔下矣然未及三世司馬專權以至篡奪蓋明帝知有封建而不知所以封建雖有名而不得實效也事

見通鑑

三月吳遣將浮海之遼東秋九月魏邀之成山斬其將

以吳
紀修

大事記續編卷二十一

欽定四庫全書

大事記續編卷二十二

明 王禕 撰

漢安樂思公建興十二年

魏烈祖明皇帝青龍二年

吳大皇帝嘉禾三年

春二月諸葛亮出斜谷約吳大舉伐魏

以通鑑修

三月庚寅

山陽公薨於魏

以魏紀修

夏四月諸葛亮屯渭南魏司馬懿

拒之亮分兵屯田

以蜀傳通鑑修

解題曰按蜀志晉書本紀亮悉大衆由斜谷出以流

馬運亮壘於郿之渭水南原引軍而濟諸將欲住渭

北以待之懿曰百姓積聚皆在渭南此必爭之地遂
引軍而濟背水為壘因謂諸將曰亮若勇者當出武
功依山而東若西上五丈原

在郿縣西南
二十三里

則諸軍無

事矣亮果屯上原諸將渡渭懿

本丈
作帝

遣周當屯陽遂

以餌之數日亮不動懿曰亮欲爭原而不向陽遂此

意可知也遣胡遵郭淮共脩陽遂遂與亮會於積石

臨原而戰

即北原也在郿縣
西北二十五里

亮不能進還於五丈原

亮每患糧不繼使已志不伸是以分兵屯田為久駐

之基懿弟孚書問軍事懿復書曰亮志大而不見機

多謀而少決好兵而無權雖提卒十萬已墮吾畫中

破之必矣餘見通鑑

後魏崔浩謂亮既據蜀恃山險之固不達時宜嚴威法控制勒蜀

人矜才負能高自矯舉出兵隴右再攻祁山一攻陳倉踈遲失會摧衄而反後入秦川不復攻城更求野戰魏人知其意以不戰屈之憤結而死浩豈足以知亮哉

五月吳主三道伐魏六月魏主遣兵助司馬懿秋七月

自率水軍東下吳軍皆退

以魏紀吳傳修

解題曰權遣陸遜諸葛瑾等屯江夏沔口孫韶張承

等向廣陵淮陽權率大衆圍合肥周魴傳孫韶等入
淮全琮朱桓趨合肥諸葛瑾步騭朱然到襄陽陸遜
潘璋等討梅敷東主自掩石陽孫奭治安陸城餘見
通鑑

八月漢武鄉忠武侯諸葛亮卒於軍征西大將軍魏延
與丞相長史楊儀相攻儀斬延率師還左將軍吳懿為
車騎將軍督漢中丞相長史蔣琬為尚書令總國事尋

加益州刺史

以蜀
傳修

解題曰晉紀亮卒諸將燒營遁走百姓奔告懿出兵
追之亮長史楊儀反旗鳴鼓若將距懿者懿不之逼
於是楊儀結陣而去經日懿行其營壘觀其遺事獲
其圖書糧穀甚衆懿審其必死曰天下奇才也辛毗
以為尚未可知也懿曰軍家所重軍書密計兵馬糧
穀今皆棄之豈有人捐其五藏而可以生乎宜急追
之追到赤岸乃知亮死審問亮部將楊儀魏延爭權
儀斬延并其衆懿欲乘隙而進有詔不許

水經注趙
子龍退軍

燒壞閭道緣谷一百餘里
諸葛死魏延焚之是道也
餘見通鑑王通曰使諸葛

亮而無死禮樂其有興乎陳壽曰備殂嗣子幼弱事
無鉅細亮皆專之於是外連東吳內平南越立法施
度整理戎旅工械技巧物究其極科教嚴明賞罰必
信至於吏不容奸人懷自厲道不拾遺強不侵弱風
化肅然也當此之時亮之素志進欲龍驤虎視包括
四海退欲跨陵邊疆震盪宇內又自以為無身之日
則未有能蹈涉中原抗衡上國者是以用兵不戢屢

耀其武然亮所與對敵或值人傑加衆寡不侔攻守
異體故雖連年動衆未能有克至今梁益之民咨述
亮者雖甘棠之咏召公鄭人之歌子產無以遠譬也
孟軻云以佚道使民雖勞不怨生道殺人雖死不忿
信矣袁晞曰亮受六尺之孤攝一國之政事凡庸之
君專權而不失禮行君事而國人不疑行法嚴而國
人悅服用民盡其力而下不怨及其兵出入如賓行
不寇芻蕘者不獵如在國中其用兵也師止如山進

退如風兵出日天下震動而人心不憂田疇辟倉廩
實器械利蓄積饒朝會不譁路無醉人孔子曰雍也
可使南面諸葛亮有焉

吳以節度諸葛恪為丹陽太守討山越

以吳傳修

解題曰江表傳曰吳王初置節度官使典掌軍糧非
漢制也

漢安樂思公建興十三年 魏烈祖明皇帝青龍三年
吳大皇帝嘉禾四年

春正月戊子魏以司馬懿為太尉

以魏紀修

解題曰賞禦敵之功也

魏皇太后以憂殂

以魏紀修

漢徙中軍師楊儀於漢嘉尋自

殺

以蜀傳通鑑修

解題曰事見通鑑薛季宣曰蜀五軍其左右將軍督

護各一人其中師監護典參軍各一人都護一人其

前師將軍監護督軍各一人其後督將軍無一人是

時戶籍士民異號往往充兵之家已非民伍然諸葛

治軍有法帥十二更張郤之戰在者八萬去者願留

亮卒士卒更相重冒姦巧非一蜀兵耗矣

漢嘉在漢為蜀郡青

衣縣今雅州廬山名山及西北徽外之地是也顏師古杜佑李賢皆誤以嘉定龍游為青衣餘見永和三

年青
衣注

夏四月漢蔣琬為大將軍錄尚書事後軍師費禕尚書

令

以蜀傳
通鑑修

魏大營宮殿減將吏俸祿

以魏
紀修

解題曰按水經注穀水東歷大夏門故夏門也陸機

與弟書云門有三層高百尺魏明帝造穀水又東逕

廣莫門北漢之穀門也北對芒阜連嶺修亘魏志曰

明帝欲平北芒令登臺見孟津侍中辛毗諫乃止其一水自千秋門南流逕神虎門下東對雲龍門衡枕之上皆列龍虎之狀以火齊薄之又南逕通門掖門西又南流東轉逕閭闔門南案禮王有五門魏明帝上法太極於洛陽南宮起太極殿於漢宗德殿之故處改雉門為閭闔門渠水又枝分夾路南逕太尉司徒兩坊間謂之銅駝街明帝置銅駝諸獵於閭闔南街東逕司馬門南明帝始築無闕門餘見通鑑

華雋洛陽

記太極殿有四金柱戴延之西征記殿上有金井闌
金博山蛟龍負山於井上又有金獅子魚蔡魏畧九
龍殿前為玉井綺欄宋敏求曰昭陽殿在太極之北
鑄黃龍高四丈鳳凰高二丈置殿前歷代正殿皆以
太極名自此始也

秋七月魏崇華殿火

以魏紀修

八月魏立子芳為齊王

以魏紀修

是歲魏幽州刺史王雄使人刺殺軻比能部落離散

以通

鑑修魏張掖水涌石負圖

以朱熹綱目修

魏以馬易珠翠於吳

以呂

祖謙標目修

漢安樂思公建興十四年
吳大皇帝嘉禾五年

魏烈祖明皇帝青龍四年

春吳鑄大錢一當五百以吳夏四月漢主如渝觀汶水

以蜀傳修

解題曰諸葛亮既死而禪始自縱矣

今茂州汶山縣漢渝縣地

漢徙武都氐王符健於廣都

以鄭樵年譜修

冬十月有星孛於

大辰又孛於東方十一月己亥彗星見

以魏紀修

漢安樂思公建興十五年吳大皇帝嘉禾六年

魏烈祖明皇帝景初元年

春正月魏黃龍見山荏散騎常侍高堂隆以為魏得土

德三月改元首建丑之月

以魏紀修

解題曰按宋禮志魏初正朔依虞夏故事若禮樂服色牲幣自當隨土德之數尚書令桓階等奏國家承漢氏人正之後當受之以地正令從漢正則犧牲不得獨改明帝在位便有改正朔之意朝議不決乃下詔公卿以下博議侍中高堂隆議軒轅高辛夏后氏漢皆以十三月為正少昊唐殷皆以十二月為正高陽虞周皆以十一月為正雖百世皆以前代正而復也大尉司馬懿尚書僕射衛臻尚書薛悌中書監劉

放中書侍郎刁幹博士秦靜以為不宜改青龍五年
山荏縣言黃龍見帝乃詔三公推三統之次魏得地
統當以建丑之月為正改青龍五年春三月為景初
元年孟夏四月服色尚黃犧牲用白或問朱熹作綱
目之意曰主在正統三國當以蜀為正而司馬光乃
云諸葛亮入寇冠屨倒置何以示訓緣此遂欲成書
熹之主意如此竊謂通鑑以魏為正則景初三年之
中故應改蜀建寅之正以從魏建丑之正綱目既以

蜀為主乃不能改魏建丑之正以從蜀建寅之正豈未及訂定故耶

秋七月魏制三祖為不毀之廟

以通鑑修

魏徵公孫淵淵反

八月遣幽州刺史毋丘儉討之不利淵自立為燕王改

元

以魏紀通鑑修

漢皇后殂

以蜀傳修

解題曰蜀傳書於六月而通鑑載於七月之後誤也

冬十月魏大水

以魏紀修

魏殺其后毛氏

以魏紀修

十一月魏詔

漢四百年無禘禮始營圓方丘南北郊

以魏紀修

吳諸葛恪

平山越

以吳傳修

是歲魏作都官考課法不果行

以通鑑修

漢將

軍王平督漢中

以蜀傳修

解題曰建興六年屬參軍馬謖先鋒謖舍水上山舉
措煩擾平連規諫謖不能用大敗於街亭衆盡星散
惟平所領千人鳴鼓自持魏將張郃疑其伏兵不往
逼也於是平徐徐收合諸營遺迸率將士而還亮既
誅謖等平特見崇顯加拜參軍統五部兼當營事九
年亮圍祁山平別守南園司馬懿攻亮張郃攻平平

堅守不動卻不能克十二年亮卒軍退還魏延作亂
一戰而敗平之功也遷後典軍副吳懿住漢中又領
漢中太守十五年代懿督漢中延熙元年蔣琬住沔
陽平署琬府事

漢安樂思公延熙元年 魏烈祖明皇帝景初二年春
吳大皇帝赤烏元年

正月漢立皇后張氏改元立子璿為皇太子以蜀傳修二月

魏遣司馬懿伐遼東以魏紀修吳鑄大錢一當千以吳傳修六月

彗星見於張以魏紀修魏司馬懿圍襄平丙寅克之斬公孫

淵以魏
紀修

解題曰按晉書本紀公孫淵遣車騎數萬阻遼隧堅
壁而守南北六七十里以拒懿懿盛兵多張旗幟欲
出其南賊盡銳赴之乃泛舟潛濟以出其北與賊營
相逼沉舟焚梁傍遼水作長圍棄賊而向襄平諸將
曰不攻賊而作圍非所以示衆也懿曰賊堅營高壘
欲以老我兵也攻之正入其計此王邑所以耻過昆
陽也古人曰敵雖高壘不得不與我戰者攻其所必

救賊大衆在此則巢窟虛矣我直指襄平必人懷內
懼懼而求戰破之必矣遂整陣而過賊見兵出其後
果邀之懿謂諸將曰所以不攻其營政欲致此不可
失也乃縱兵逆擊大破之三戰皆捷賊保襄平進軍
圍之餘見通鑑始公孫度以中平六年據遼東至淵

三世凡五十年

通鑑先載諸將欲擊之然後載懿潛濟水出其北但懿既未濟水安能擊

賊懿謂敵雖高壘不得不與我戰者攻其所以救故懿整陣而過賊兵邀之乃縱兵逆擊通鑑所載不如

晉紀
明白

秋八月吳改元

以吳傳修

吳中書郎呂壹伏誅

以通鑑修

冬十一

月漢蔣琬屯漢中以王平為前護軍

以蜀傳修

魏立夫人郭

氏為皇后以燕王宇為大將軍劉放孫資薦武衛將軍

曹爽及司馬懿甲申免宇以爽代之十二月丁亥朔立

齊王芳為太子懿爽受遺輔政魏主殂太子芳即皇帝

位尊皇后曰皇太后加懿爽侍中假節鉞都督中外諸

軍錄尚書事諸宮室之役皆以遺詔罷之

以魏紀通鑑修

解題曰按晉書后妃傳魏明帝世懿居上將之任諸

子並有雄才大畧師妻夏侯氏知師非魏之純臣而
夏侯氏魏之甥師深忌之青龍二年遂以鴆卒青龍
二年明帝即祚之八年也時國未有釁而懿父子逆
節已萌其婦與妻知之而舉朝莫之知也孫資劉放
且薦懿入朝使參顧命天方以典午為曹氏之斤斧
固宜人謀之踈哉餘見通鑑又按光武征伐四方始
置督軍御史建安中曹操以曹仁都督七軍討田銀
魏文即位改監某州諸軍事為都督某州諸軍事曹

仁都督荆揚益州曹真都督雍涼州臧霸都督青州
是也杜佑謂始於黃初三年非也都督中外諸軍事
始黃初三年爾至是與懿以受遺居此任大和四年

懿代蜀遂加大都督矣

宋職官志曰都督諸軍為上
監諸軍次之督諸軍為下使

持節為上持節次之假節為下使持節得殺二千石
以下持節殺無官位人若軍事得與使持節同假節
惟軍事得殺犯軍令者江左都督中外尤重惟王導
等乃居之宋氏人臣無居者惟江夏王義恭假黃鉞
假黃鉞則專戮節
將非人臣常器

漢安樂思公延熙二年
吳大皇帝赤烏二年

魏邵陵厲公曹芳景初三年

春正月丁丑魏以司馬懿為太傅曹爽弟羲為中領軍

訓為武衛將軍彥為散騎常侍爽引散騎侍郎何晏散

騎常侍丁謐等為腹心

以魏紀修

三月漢蔣琬為大司馬

蜀

傳冬十一月吳將廖式反於臨賀討平之

以通鑑目錄修

魏復

以建寅為正改元

以通鑑修

漢安樂思公延熙三年

魏邵陵厲公正始元年

吳大皇帝赤烏五年

漢安樂思公延熙四年

魏邵陵厲公正始二年

吳大皇帝赤烏四年

春吳零陵太守殷札請大舉伐魏不能用夏四月吳遣

四將入魏境

以吳傳修

解題曰漢晉春秋殷札言於權曰今天棄曹氏喪誅累見虎爭之際而幼童蒞事陛下身自御戎取亂侮亡宜滌荆揚之地舉彊羸之數使强者執戰羸者轉運西命益州軍於隴右授諸葛瑾朱然大衆指事襄陽陸遜朱桓別征壽春大駕入淮陽歷青徐襄陽以西困於受敵長安以西務對蜀軍許洛之衆勢必分離犄角瓦解民必內應將軍對向或失便宜一軍敗

績則三軍離心便當秣馬脂車陵蹈城邑乘勝逐北以定華夏若不悉軍動衆循前輕舉則不足大用易於屢退民疲威消時往力竭非出兵之策也

五月吳太子登卒

以通鑑修

吳園樊六月魏司馬懿帥師拒

之吳師遁

以魏紀吳傳修

是歲魏屯田淮南北開漕渠

以通鑑修

解題曰時欲廣田畜穀使鄧艾行陳項已東至壽春艾以為田良水少不足以盡地利宜開河渠引水澆溉大積軍糧又通運漕之道又以為昔破黃巾因為

屯田積穀許都以制四方今三隅已定事在淮南每
大軍征舉運兵過半功費巨億陳蔡之間土下田良
可省許昌左右諸稻田并水東下令淮北屯二萬人
淮南三萬人十二分休常有四萬人且田且守計除
衆費歲完五百萬斛六七年間可積三千萬斛此則
十萬之衆五年食也事皆施行餘見通鑑葉適曰以
今約之則收少而食多未知當時調度如何然作田
計夫軍食計口古今所同不能一夫耕百畝而食六

十斛也

管寧卒於魏

以朱熹
綱目修

解題曰蘇軾曰曹操既得志士人靡然歸之文若盛
德猶為之經營謀慮一旦小異便為所殺孔文舉奇
逸博聞志大而才疎每所建輒中操病況肯為用乎
然終亦不免桓溫謂孟嘉曰人不可無勢我乃能駕
御卿溫之才百倍於嘉所以云爾者自知其陰賊險
狠不為高人勝士所比數爾管幼安懷寶遜世龍驤

海表其視曹操父子真穿窬斗筭而已終身不屈既

不可得而用其可得而殺乎賢於文若文舉遠矣

蘇轍

贊曰幼安之賢無以過人余獨何以謂賢賢其明於知人審於處己以能自全幼安之老歸自海東一畝之宮閑不求通白帽布屨舞雩而風四時烝嘗饋奠必躬八十有四蟬蛻而終少非漢人老非魏人何以命之天之逸民

漢安樂思公延熙五年

魏邵陵厲公正始三年

春正

吳大皇帝赤烏五年

月吳立子和為皇太子

以呂祖謙標目修

秋七月吳擊儋耳珠

崖

以通鑑修

解題曰按吳傳權欲遣偏師取夷州及珠崖皆以諮
陸遜遜上疏曰今兵興歷年見衆損減陛下憂勞聖
慮忘寢與食將遠規夷州以定大事臣惟萬里襲取
風波難測民易水土必致疾疫今驅見衆經涉不毛
欲益更損欲利反害又珠崖絕險民猶禽獸得其民
不足濟事無其兵不足虧衆但當育養士民寬其租
賦衆克在和義以勸勇則河渭可清矣全琮曰殊方
異域隔絕瘴海水土氣毒自古有之兵入民出必生

疾病轉相汚染往者懼不能返所獲何可多致權不聽餘見通鑑

八月吳封子霸為魯王

以吳傳修

漢安樂思公延熙六年 魏邵陵厲公正始四年 夏四

吳大皇帝赤烏六年

月魏立皇后甄氏

以魏紀修

五月朔日有食之既

以通鑑修

冬十

月漢蔣琬還涪王平為前監軍督漢中十一月費禕為

大將軍錄尚書事

以蜀傳修

解題曰琬以諸葛亮數閱秦川道險運艱竟不能克

乃作舟船欲由漢沔襲魏興上庸會疾未行而衆論咸謂如不克捷還路甚難於是遣費祹等喻指琬承命上疏曰自臣奉辭漢中已經六年規方無成夙夜憂慘今魏跨帶九州平除未易若東西并力首尾掎角雖未能速得如志且當分裂蠶食先摧其支黨然吳期二三連不克果輒以祹等議以涼州胡塞之要進退有資且羌胡乃心思漢如渴宜以姜維為涼州刺史若維征行銜持河右臣當帥軍為繼今涪水陸

四通惟急是應若東北有虞赴之不難由是遂還住

涪張栻曰琬非應變之才也

琬疏通鑑載於四年按琬言秦辭漢中已經六年

琬以元年十一月屯漢至此已經六年始還住涪又姜維傳亦云六年領涼州刺史則此疏在六年無疑

魏曹固上疏論封建曹爽不能用

以舉要歷補遺修

漢安樂思公延熙七年吳大皇帝赤烏七年

魏邵陵厲公正始五年春正

月吳上大將軍陸遜為丞相鎮武昌

以呂祖謙標目修

二月魏

曹爽帥師伐漢三月漢王平据興執以拒之閏三月復

遣費禕救之

以魏紀修

解題曰左護軍劉敏與鎮北大將軍王平俱鎮漢中

曹爽襲蜀或謂但可守城不出拒敵必自引退敏以

為男女布野農穀栖畝若聽敵入則大事去矣遂率

所領與平據興勢多張旗幟綿亘百餘里餘見通鑑

夏四月朔日有食之

以通鑑修

五月魏軍退走

魏紀

是歲冬漢

費禕為益州刺史侍中董允守尚書令

以通鑑修

漢安樂思公延熙八年

魏邵陵厲公正始六年

春正

月吳太子和與魯王霸禮秩如一陸遜上疏諫吳主切

責之二月遜自殺子建武校尉抗代領其衆

以吳傳蕭方二十國

春秋
修

解題曰按吳錄權見楊竺辟左右而論霸之才竺深
述霸有文武英姿宜為嫡嗣權許焉有給使伏於牀
下具聞之以告太子陸胤當至武昌往辭太子太子
不見而微服至其車上與共密議欲令陸遜表諫既
而遜有表極諫權疑竺泄之竺辭不服權使竺出尋
其由竺白頃惟胤西行必其所道又遣問遜遜言胤

所述召胤考問胤為太子隱曰楊竺向臣道之遂共
為獄竺不勝痛毒服是所道乃斬竺晉春秋蕭方三
十國春秋云遜自縊死抗年二十以父喪還遂絕賓
客權所賜一無所領及權意解使抗屯柴桑泣涕與
別曰吾前用讒言與汝父大義不篤以此負汝前後
之事一皆焚也抗流涕不答時人高之餘見通鑑

秋八月漢皇太后殂

以蜀
傳修

解題太后吳氏通鑑云甘太后未見所出

冬十二月漢費禕行漢中圍守

以通鑑修

解題曰時王平以武將鎮漢中故禕自行圍守至明

年六月而還

漢安樂思公延熙九年

魏邵陵厲公正始七年

春二

吳大皇帝赤烏九年

月吳車騎將軍朱然攻魏柤中破之

以通鑑目錄修

解題曰按漢晉春秋柤中民吏萬餘家渡沔司馬宣

王謂曹爽曰若便令還必復致寇宜權留之爽曰今

不修守沔南留民沔北非長策也宣王曰不然凡物

置之安地則安危地則危故兵書曰成敗形也安危
勢也形勢御衆之要不可不審設令賊二萬人斷沔
水三萬人與沔南諸軍相持萬人陸鈔祖中君將何
以救之爽不聽卒令還然後襲破之袁淮言於爽曰
吳楚之民脆弱寡能英才大賢不出其土不足與中
國相抗然常爲中國患者蓋以江漢爲池舟楫爲用
利則陸鈔不利則入水攻之道遠中國之長技無所
用也孫權十數年來大畋江北繕治甲兵精其守禦

數出盜竊敢遠其水陸次平土此中國所願聞也夫
用兵者貴以飽待饑以逸擊勞師不欲久行不欲遠
守少則固力專則強今宜捐淮漢已南退却避之若
賊入居中央來侵邊境則隨其所短中國之長技得
用矣若不敢來則邊境得安無鈔盜之憂我國富兵
強政脩民一矣今襄陽孤在漢南賊循漢而上則斷
而不通一戰而勝則不攻而自服故置之無益於國
亡之不足為辱遂不徙

襄陽記粗中在上黃界去襄陽一百五十里鄭鮮曰木渠

木里溝也出中廬西上擁鄢水東南四十五里逕宜城東北四十五里入沔後漢王寵復鑿蠻水與之合溉田六十餘頃曹魏時夷王梅敷弟兄聚民萬餘家據之後朱然而提兵爭其地不得後渠益廢

葉適曰權是時不止於守江而又欲為取淮漢以比之規故也孫氏及五代江淮攻守大略類此自吳揚氏無爭淮北之勢而淮不可守唐李氏割淮臣周不敢窺江以北而江不可守宋建炎紹興則以淮守淮以江守江而孫氏及五代之故實遂不及講

魏母丘儉討高句驪夏討滅貊破之

以魏紀修秋九月吳驃

騎將軍步騭為丞相分荊州為二部鎮南將軍呂岱為

上大將軍督武昌以西將軍諸葛恪為大將軍鎮武昌

以通鑑修

吳罷大錢

以通鑑修

冬十一月漢安陽恭侯蔣琬卒

以蜀

傳

漢董允卒

以蜀傳修

解題曰按蜀志琬與董允俱以延熙九年卒通鑑載於八年而目錄書於九年疑編寫之誤

漢安樂思公延熙十年

魏邵陵厲公正始八年

春二

月朔日有食之

以魏紀修

解題曰以長歷考之庚午朔也

三月吳作太初宮

以吳傳修

解題曰南朝宮苑記太初宮方五百丈本長沙桓王故府黃龍元年都建業因居故府不改北直臺城西掖門路

魏曹爽遷太后於永寧宮夏五月魏司馬懿稱疾不與

政

以通鑑修

解題曰丁謚畢軌等既進用數言於爽曰宣王有大

志而甚得民心不可以推誠委之由是爽恒猜防焉
禮貌雖存而諸所興造皆不復由宣王宣王不能爭
且懼其禍故避之餘見通鑑

是歲漢以選曹郎陳祗為侍中黃門令黃皓始用事

以蜀

修傳

解題曰陳祗代董允為侍中則在允既卒之後也通
鑑亦誤於八年書之

漢涼州刺史姜維為衛將軍錄尚書事

以蜀
傳修

解題曰十年維遷衛將軍與大將軍費祗錄尚書事

通鑑載於九年

魏雍涼羗胡降漢漢姜維出隴右與魏雍州刺史郭淮

戰於洮西

以通鑑蜀傳修

漢安樂思公延熙十一年吳大皇帝赤烏十一年

魏邵陵厲公正始九年

夏

四月魏以光祿大夫徐邈為司空不受

以魏紀修

解題曰盧欽著書稱邈曰或問徐公當武帝之時人

以為通自在涼州及還京師人以為介何也答曰往

者毛孝先崔季珪等用事貴清素之士於時皆變易
車服以求名高而徐公不改其常故人以為通比來
天下奢靡轉相倣效而徐公雅尚自若不與俗同故
前日之通乃今日之介也是世人之無常而徐公之
有常也餘見通鑑呂祖謙曰大抵人為世俗所驅有
為善所驅始可用力至於不為善
所驅始可見其胸中之有所立

五月漢費禕屯漢中

以通鑑
目錄修

解題曰王平卒故也

大事記續編卷二十二

欽定四庫全書

史部

大事記續編卷二十三

四

詳校官檢討臣朱依昊

編修臣裴謙覆勘

總校官編修臣倉聖肱

校對官典簿臣劉景岳

謄錄監生臣費元震

欽定四庫全書

大事記續編卷二十三

明 王禕 撰

漢安樂思公延熙十二年魏邵陵厲公正始十年嘉平元年吳大皇帝赤烏十二年

春正月甲午魏主謁明帝陵曹爽兄弟從司馬懿以皇太后令閉城門勒兵奏免爽等魏主還戊戌懿殺爽兄弟及尚書丁謐鄧颺何晏大司農桓範等皆夷三族丁未懿自為丞相加九錫辭不受右將軍夏侯霸奔漢

魏

紀通鑑修

解題曰按晉書本紀世語正始六年大將軍曹爽毀中壘營以兵屬其弟中領軍羲懿禁之不可八年爽遷太后於永寧宮專擅朝政兄弟並典禁兵屢改制度懿不能禁爽兄弟數俱出遊司農桓範謂曰總萬機典禁兵不宜並出若有閉城門誰復納人者爽曰誰敢爾耶由此不復並行天子謁高平陵孫盛魏世籍曰高平陵在洛水南太后山去城九十里爽兄弟皆從懿於是奏太后廢爽兄弟時懿子師為中護軍將兵屯司馬門懿列陣闕

下假司徒高柔節行大將軍事領爽營謂柔曰君為

周勃矣命太僕王觀行中領軍攝義營懿帥太尉蔣

濟等勒兵出迎天子屯于洛水浮橋餘見通鑑

薛季宣曰

魏兵制畧如東漢南北軍如故有中左右前後軍各一師又有中護軍中領軍領護軍將軍各一人其他雜號無常數初操置武衛營於相府以領軍主之文帝增置中壘營於是二營將軍而以領軍將軍并五校統之也葉適曰曹操三世諸將未有擅兵於外者蓋

人主自執其權也司馬懿累立大功年當垂七十欲取其兵柄而不能忽值齊王童幼爽義子弟晏颺文

吏皆莫以為意故懿父子得募士於外以逆行之然亦可謂至危矣使晏等有一人知出於此第不至棄軍遊蕩懿父子何由得肆其志正與呂須事同矣

夏四月乙丑魏改元

以魏紀修

秋漢姜維攻魏雍州不克

以蜀

修傳

解題曰史容曰建安中復禹貢九州置雍州魏文帝分河西為涼州隴右為秦州三輔屬司隸晉地理志通典皆云晉初置雍州而此時已有雍州則不始於

晉矣大抵晉書言晉所置州郡往往已多見於魏

冬十二月辛卯魏以司空都督揚州軍事王凌為太尉

以魏
紀修

解題曰按列傳晉春秋凌外甥令狐愚為兗州刺史
舅甥並典兵專淮南之重密協計謂齊王不任天位
楚王彪長而才欲迎立彪都許昌九月愚遣將張式
至白馬與彪相問往來凌又遣舍人勞精詣洛陽語
子廣廣曰凡興大事應本人情今曹爽以驕奢失民

何平叔虛而不治丁畢桓鄧雖並有宿望皆專競於
世加變易朝典政令數改所存雖高而事不下接民
習於舊衆莫之從故雖勢傾四海聲震天下同日斬
戮名士減半而百姓安之莫之或哀失民故也今懿
情雖難量事未有變而擢用賢能廣樹勝已修先朝
之政令副衆心之所求爽之所以為惡者彼莫不改
夙夜匪懈以恤民為先父子兄弟並握兵要未易亡
也凌不從餘見通鑑

裴松之曰如此言之類前史不載而獨出習氏疑繫齒所自造

者也

漢安樂思公延熙十三年魏邵陵厲公嘉平二年秋
吳大皇帝赤烏十三年

八月吳廢太子和賜魯王霸死冬十一月吳立子亮為

皇太子

以吳傳修

吳作堂邑涂塘

以吳傳修

解題曰塗塘在今真州六合縣西二十五里蓋塞滁
水以為塘也後周置瓦梁郡陳吳明徹平之有上瓦
梁下瓦梁堰上瓦梁一名石梁在天長下瓦梁在六
合南塘何延錫曰由滁河而上數百里五十四流輻

湊吳堰李氏發煬帝陵石封滁口欲揖長源西流指
高岸橫亘未及就宋景德元年毀之

十二月魏征南將軍王昶襲吳破之

以魏紀修

魏罷校事官

以魏傳修

解題曰時校事放橫黃門侍郎程曉上疏曰周禮云
設官分職以為民極春秋傳曰天有十日人有十等
愚不臨賢賤不臨貴明試以功九載考績各修厥業
思不出位斯誠為國要道也秦漢雖官名改易職司

不同初無校事之官干預庶政者也武皇帝大業
草創衆官未備而軍旅勤苦民心不安乃有小罪不
可不察故置校事取其一切此霸世之權宜其後漸
蒙見任上察宮廟下設衆司官無局業職無分限隨
意任情惟心所適法造於筆端不依科詔獄成於門
下不顧覆訊其選官屬以謹慎為粗疏以認詞為賢
能其治事以刻暴為公嚴以循理為怯弱外則託天
威以為聲勢內則聚羣奸以為腹心大臣耻與分勢

含忍而不言小人畏其鋒芒鬱結而無告至使尹樸
公於目下肆其奸慝今外有公卿將校總統諸署內
有侍中尚書綜理萬機司隸校尉督察京輦御史中
丞董攝宮殿皆高選賢才以充其職申明科詔以督
其違者此諸賢猶不足任校事小吏益不可信於是
遂罷校事官

漢安樂思公延熙十四年

魏邵陵厲公嘉平二年

吳大皇帝太元元年

夏魏王凌謀立楚王彪司馬懿帥師討之五月甲寅

凌自殺併其黨夷三族

以魏紀傳
通鑑修

解題曰潁州潁丘縣吳魏之際關防莫謹於此事見

通鑑

魏揚州刺史諸葛誕為鎮東將軍都督揚州軍事

以通鑑修

吳立夫人潘氏為皇后

以吳傳修

六月魏賜楚王彪死錄諸

王公於鄴

以魏紀
通鑑修

漢費禕還成都

以蜀傳修

秋七月壬戌魏

皇后甄氏殂

以魏紀修

八月戊寅魏舞陽宣文侯司馬懿卒

其子衛將軍師自為撫軍大將軍錄尚書事

以魏紀修

解題曰蘇轍曰世之說者曰司馬仲達之於魏即曹孟德之於漢也二人智勇權畧則同而所處則異漢自董卓之後內潰外畔帝王之勢盡矣獨其名在且曹公假其名號以服天下擁而植之許昌建都邑征畔逆皆曹公也仲達則不然明帝之末曹氏之業固矣雖明帝以淫虐失衆曹爽以驕縱得罪而顛覆之形未見天下未畔魏也仲達因其隙而乘之拊其背而奪其成業事與曹公異矣事見通鑑

冬十月吳徵諸葛恪領太子太傅

以吳傳修

漢費禕屯漢壽

以蜀傳修

解題曰今利州綿谷縣蜀王弟所封史記所謂真蜀相攻者也

漢安樂思公延熙十五年吳會稽王孫亮建興元年

魏邵陵厲公嘉平四年

春

正月癸卯魏司馬師自為大將軍

以魏紀修

吳封故太子

和為王

以吳傳修

二月魏立皇后張氏

以魏紀修

吳改元神鳳

以吳

傳修吳殺其后潘氏

以吳傳修

吳主召諸葛恪會稽太守滕胤

受遺輔政夏四月殂太子亮即皇帝位改元閏五月以
恪為太傅太常滕胤為衛將軍領尚書事呂岱為大司

馬

以吳
傳修

解題曰吳書權寢疾意頗感悟欲徵太子和還立之

全公主及孫峻孫弘固爭之乃止餘見通鑑

宋庠紀
年通譜

亮立不俟踰年而改
元建興本劉禪年號

蘇轍曰任人莫難於託國漢武

帝因文景之後虐用其民幾喪天下晚歲託國於霍
光知用兵之害與民休息而天下復安固蜀先主知

嗣子之暗弱舉國而付之孔明孔明又廢李嚴楊儀
援蔣琬而授之雖後主之不明而守國三十餘年其
君臣過於魏吳遠甚吳大帝方其屬任賢將抗衡中
原曹公憚之及其老也賢臣死亡畧盡喜諸葛恪之
勁悍越衆而付以後事恪乘用兵勞民之後繼起大
役兵折於外既歸而不能自克時復肆志於僚友既
以喪其軀而孫氏因之三世絕統國隨以亡彼以進
取之資用進取之臣以徼一時之功可耳至於託六

尺之孤寄千里之命而亦屬之斯人其勢必至是我

冬十月吳諸葛恪城東興十一月魏三道擊吳十二月

恪大破之

以魏紀
吳傳修

解題曰東興一名東關在今和州含山縣無為軍巢

縣

今在無為州東南五十里濡
須今在上七寶濡須兩山之間

吳武昌端門內殿災

以吳
傳修

解題曰吳錄諸葛恪有遷都意更起武昌宮今災者

恪所新作

漢安樂思公延熙十六年 魏郡陵厲公嘉平五年 春
吳會稽王建興十年

正月朔盜殺漢費禕

以蜀傳修

解題曰事見通鑑陳亮曰亮死漢事不可為蔣琬費
禕亦相繼淪謝漢之區區遺文猶不使之自託地上
耶天命果可畏哉呂祖謙曰諸葛亮治蜀之規模其
耕戰之法立國之紀綱賞罰之信必人所共知亮死
後其規模猶足以維持二十年以劉禪之庸而蜀不
亂此後人所不能知也蓋亮能收拾人才故亮死蔣

琬代之琬之後董允費禕代之此亮之規模也

丙寅吳立皇后全氏

以吳傳修

庚午魏軍退

以吳傳修

魏諸葛誕

為鎮南將軍都督豫州毋丘儉為鎮東將軍都督揚州

軍事

以通鑑修

二月吳加諸葛恪荊揚牧督中外軍事

以通鑑修

夏四月漢姜維出石營圍魏南安

以通鑑修

解題曰按蜀書列傳姜維出石營圍魏南安通鑑云

圍狄道乃明年事

夏四月吳諸葛恪攻魏五月圍新城魏遣太尉司馬孚

救之

以吳傳修

漢姜維還

以呂祖謙標目修

秋七月吳軍還冬十月

將軍孫峻殺諸葛恪夷其三族自為丞相大將軍都督

中外諸軍事殺南陽王和

以吳傳通鑑修

十一月吳改明年元

紀修

解題曰通鑑不書闕也

漢安樂思公延熙十七年
年吳會稽王五鳳元年

魏高貴鄉公曹髦正元元

解題曰宋庠紀年通譜五鳳本漢宣帝年號吳有大

鳳五故改元宋書五行志吳人改元五鳳漢桓帝時

有五色大鳥司馬彪云政治衰缺無以致鳳乃羽孽耳孫亮殆與桓帝同歟

春二月魏司馬師殺中書令李豐太常夏侯玄光祿大夫張緝等夷其三族三月廢皇后張氏夏四月立王氏

為皇后

以通鑑修

解題曰按三國志列傳魏畧世語玄以曹爽抑絀內不得意中書令李豐雖宿為大將軍所親待然私心在玄遂結皇后父張緝謀欲以玄輔政豐既內握權

柄子尚公主又與緝俱馮翊人故緝信之嘉平六年
二月當拜貴人豐等欲因御臨軒諸門有陞兵誅大
將軍以玄代之以緝為驃騎將軍豐密語黃門監蘇
鑠永寧署令樂敷冗從僕射劉賢等曰卿諸人居內
多有不法大將軍嚴毅累以為言張當可以為誠鑠
等皆許從命豐為中書令二歲帝比每獨召與語不
知所說大將軍本文作景王知其議已舍人王秉請以命
請豐豐若無備情屈勢迫必不來若不來秉一人足

以制之若知謀泄以衆挾輪長戟自衛徑入雲龍門挾天子登陵雲臺臺上有三千人衆鳴鼓會衆如此義所不及也乃遣義以車迎之豐見劫迫隨義而至

餘見通鑑

蘇軾曰夏侯玄好老莊之言與何晏等皆有盛名然晏卒陷曹爽黨中玄亦不免李

豐之禍晏目玄以易之所謂深者而玄目晏以神及其遇禍深與神果安在乎

漢姜維加督中外軍事六月攻魏隴西

以蜀傳修

秋九月甲

戌魏司馬師廢其主為齊王太宰中郎范粲稱疾不出

丁丑師迎立文帝孫高貴卿公髦冬十月庚寅即皇帝

位改元遷齊王於河內

以魏紀修

癸巳魏司馬師自加殊禮

以魏紀修

解題曰按魏志假大將軍司馬景王黃鉞入朝不趨奏事不名劔履上殿通鑑不書闕也

漢姜維拔魏河間臨洮而還

以通鑑修

解題曰河間今熙州史容曰河間當作河關今西寧

州龍支城臨洮

按晉載記呂光遣弟延攻臨洮武始河關皆克之則河關為是西和

州大潭縣東臨洮城

漢安樂思公延熙十八年魏高貴鄉公正元二年春
吳會稽王五鳳二年

正月魏毋丘儉及揚州刺史文欽起兵討司馬師戊午師帥師
拒之閏月吳孫峻等襲魏壽春己亥師破欽於樂嘉欽降吳儉
走死夷其三族諸葛誕為鎮東大將軍都督揚州軍事
師卒于許昌二月丁巳其弟衛將軍昭自為大將軍錄
尚書事吳以文欽為都護鎮北大將軍

以魏紀吳
傳通鑑修

解題曰水經注潁水入東南逕博陽縣城東城在南
頓縣北四十里王莽更名樂嘉今淮寧府宛丘縣四

十里有博陽城

三月魏立皇后卞氏

以魏紀修

夏漢姜維攻魏秋八月大破

魏雍州刺史王經于洮西圍狄道不克遂屯鍾提

以蜀傳通

鑑修

解題曰或作鍾題未詳其地

冬十二月吳始作太廟

以通鑑修

是歲吳城廣陵

以吳傳修

解題曰按孫韶為廣陵太守權為吳王遷將軍為邊

將數十年青徐汝沛頗來歸附淮南濱江屯候皆撤

兵遠徙徐泗江淮之地不居者各數百里則吳初疑
已得廣陵及考杜佑通典注乃謂嘉平後屬吳三國
志吳傳五鳳二年使衛尉馮朝城廣陵拜將軍吳穰
為廣陵太守則孫韶蓋遙領耳通典建興元年馮朝
城亦非也

漢安樂思公延熙十九年 魏高貴鄉公甘露元年
吳會稽王太平元年 春

正月漢以姜維為大將軍以蜀傳修夏四月庚戌魏司馬昭

服袞冕赤舄以魏紀修丙辰六月丙午魏改元以通鑑修

解題曰宋庠紀年通譜甘露本漢宣帝年號五月鄴上谷並言甘露降故改元

秋七月漢姜維攻魏八月魏將軍鄧艾大破之於段谷魏以艾為鎮西將軍都督隴右軍事漢貶維為衛將軍以魏紀蜀傳通鑑修

解題曰通典秦州上邽有段谷水天水軍

庚午魏司馬昭自加大都督奏事不名假黃鉞以魏紀修吳

孫峻遣文欽及將軍呂據等圖魏青徐九月丁亥峻卒

其從弟偏將軍絃自為侍中領中外軍事召據等還據等表驃衛將軍滕胤為丞相冬十月絃殺胤夷其三族已酉改元辛亥據自殺十一月絃自為大將軍

以吳傳通鑑修

漢安樂思公延熙二十年吳會稽王太平二年

魏高貴鄉公甘露二年

夏四月

甲子魏徵諸葛誕為司空不就五月降吳六月司馬昭奉魏主及太后討之吳遣文欽等救誕魏圍壽春秋七月吳孫綝屯鎧里使將軍朱異救之不克九月殺異而歸冬漢姜維出駱谷至芒水以攻魏

以魏紀吳蜀傳修

解題曰鑊里在今安豐之壽春縣駱谷在鳳翔府盩厔縣西南漢魏舊道自鄠縣入谷出洋州興勢縣界夏侯玄入漢中鍾會伐蜀晉司馬勲破後趙唐李元奕高崇文趨梓州德宗僖宗韋興元出入皆由此道姜維連歲出師不過隴西今出隴東者蓋魏分關中兵以赴淮南維欲乘其虛也

漢安樂思公景耀元年 魏高貴鄉公甘露三年
吳景皇帝孫休永安元年

春正月

諸葛誕殺文欽二月魏克壽春殺誕夷其三族

以魏紀舉要
歷補遺修

解題曰事見通鑑周端朝曰司馬篡勢定矣淮南三臣皆嬰鋒先死諸葛誕麾下數百人拱手為列不降每降一人輒斬之卒不變以至於盡此與田橫之士何異不聞一言表而出之通鑑徒舉習鑿齒史論嗚呼習生不耻為司馬氏頌功德千百年後當有回易此論者反表而出之尊叛逆而排死節高篡奪而抑冤忠顯叛臣賊子為功高業大去春秋大義不已遠乎所謂使揚土懷愧不知揚土當愧晉乎抑晉愧揚

土乎彼誕麾下數百人蓋揚土之人而反使愧昭鳴呼甚哉

漢姜維復為大將軍

以蜀傳修

夏五月司馬昭自為相國晉

公加九錫復讓不受

以通鑑修

秋八月吳主謀誅孫綝九月

綝廢之為會稽王尚書桓彝死之己未迎立琅邪王休

冬十月己卯即皇帝位改元綝自為丞相己丑封故南

陽王和子皓為烏程侯十二月戊辰綝伏誅夷其三族

以吳傳通鑑修

是歲漢改元

以蜀傳修

解題曰宋庠紀年通譜史官言景星見故改元通鑑
不書闕也

漢黃皓為中常侍奉車都尉

以蜀傳修

漢撤漢中兵屯樂壽

及漢樂二城

以呂祖謙標目修

解題曰曹爽之入漢中蜀諸將欲退守漢樂城王平
謂賊若得關便為深禍乃屯興勢而爽不得前蓋要
害之地當尺寸爭之今無故撤圍而退此鍾會所以
得綴王含蔣斌而趣陽安口也事見通鑑

漢安樂思公景耀二年 魏高貴鄉公甘露四年
吳景皇帝永安二年

漢安樂思公景耀三年 魏元皇帝曹奐景元元年春
吳景皇帝永安三年

正月乙酉朔日有食之 以晉志修 夏五月己丑魏主討司馬

昭見弑尚書王經死之昭迎立武帝曾孫常道鄉公璜

更名奐甲寅即皇帝位改元 以魏紀修

解題曰按魏氏春秋戊子夜帝自將冗從僕射李昭
從官焦伯等下陵雲鎧仗授兵欲因際會自出討昭
會雨有司奏却日遂見王經等出黃素詔於懷曰是

可忍也孰不可忍也今日便當決行此事入白太后

遂拔劍升輦率殿中宿衛蒼頭官僮擊戰鼓出雲龍

門賈充自外入帝師潰散

薛季宣曰魏氏兵權外聚於州牧而內歸於大將軍

太尉自曹爽誅而兵柄在司馬氏於是潛銷方面併營以貳於已故文欽數其罪謂三方之守一朝廢闕多選精兵以自營衛五營領兵闕而不補多載器械歸之本營也是時天子親兵唯殿中蒼頭黃門是以高貴卿公徒手為禍然司馬師猶憚四征遂猶稱天召諸葛誕以奪其兵及誕等敗而魏祚移矣

子手劍奮擊衆莫敢逼充即厲將士騎督成倅弟濟

以矛進帝崩于車餘見通鑑

魏伐蜀吳人問張悌曰司馬氏得政以來大難

屢作智力雖豐而百姓未服也今又竭其資力遠征巴蜀兵勞民疲而不知恤何以能濟悌曰不然曹操雖功蓋中夏崇詐仗術征伐而已民畏其威不懷其德也不敵承之係以慘虐內興宮室外懼雄豪彼之失民為日久矣司馬懿父子自握其柄除其煩苛而布其平惠為之謀主而救其疾苦民心歸之亦已久矣淮南三叛而腹心不擾曹髦之死四方不動任賢使能各盡其心其根本固矣姦計立矣今蜀閣宦專朝國無政令因危而伐殆其克乎陳亮曰民心要何常哉飽食以嬉不知堂廡之為適負戴而疲勞望婆娑之木而憩焉往往忘去木固不可久也又將安所底止乎哉

吳黜會稽王亮為候官侯亮自殺

以吳傳修是歲鮮卑索頭

部拓跋力微遷定襄之盛樂

以後魏紀修

解題曰此元魏之先也水經注曰渠水西北逕成樂

固北魏土地記雲中城東八十里有成樂城今雲中

郡治也又西南逕雲中故城趙武侯築也

元和郡縣志唐單于

大都護府東受降城漢定襄之盛樂也管金河縣通典雲州注後魏盛樂縣亦在郡界然則盛樂蓋在都護府雲州之間也

漢安樂思公景耀四年

魏元皇帝景元二年

漢安樂思公景耀五年

魏元皇帝景元三年

秋八月

乙酉吳立皇后朱氏戊子立子璽為皇太子

以吳傳修

解題曰吳錄音如湖水灣澳之灣

冬十月漢姜維攻魏洮陽鄧艾大破之於侯和維退屯

沓中

以蜀傳修

解題曰晉惠帝分臨洮立洮陽縣今洮州臨潭縣有

洮陽城張駿收河南地至于狄道

今熙州有狄道縣

置武街

石門侯和湫川甘松五屯則侯和盖和南地也王猛救

隴西李儼使王撫守侯和則侯和盖近秦州也

按興地廣

記唐洮州於舊洪和城置美相縣疑洪與侯音近

鄧艾自狄道趣沓中至陰

平則沓中正在狄道陰平之間崔鴻十六國春秋乞
伏熾磐討彭利和於澁川師次沓中澁川沓中相近
也甘松沓中為古松州去文州三百里維退沓中此
鄧艾所以得綴其軍也事見通鑑

吳衛將軍濮陽興為丞相與尤將軍張布用事

以呂祖謙標目

修魏嵇康等放逸司馬昭殺康

以通鑑修

解題曰按晉書列傳虞預雅好經史憎疾玄虛其論
阮籍裸袒比之伊川被髮所以胡虜遍於中國以為

過衰周之時餘見通鑑

魏司隸校尉鍾會為鎮西將軍都督關中軍事漢姜維請備陽安關口及橋頭黃皓啓寢其事

以呂祖謙
標目修

解題曰韓子中曰關口即關城在武興南漢水上水經注漢水西南注關城北太平寰宇記三泉縣治嘉陵江關城倉陌可推關城所在水經注曰水東南逕陰平故城南又東南逕橋頭諸葛緒邀姜維於此

今文

州有陰平橋事見通鑑

漢安樂思公炎興元年 魏元皇帝景元四年 夏五月吳
吳景皇帝永安六年

交趾呂興反降魏

以呂傳通鑑目錄修

魏遣鍾會鄧艾及雍州刺史諸葛

緒伐漢廷尉衛瓘監其軍秋八月漢遣將張翼廖化等拒

之改元九月會入漢中拔關口艾敗姜維于洴川維退

屯劔閣冬十月吳攻魏壽春沔中以救漢

以魏紀蜀吳傳修

解題曰按魏蜀志魏使征西將軍鄧艾督帥諸軍趣

甘松沓中以羅取維雍州刺史諸葛緒會諸軍趣武

都高樓首尾蹙討若禽維便當東西並進又命鎮西

將軍鍾會由駱谷伐蜀會將向駱谷艾將入沓中遣

廖化詣沓中為維援張翼董厥等詣陽安關口為諸

軍外助至陰平聞諸葛緒向建威故住待之月餘改

元炎興

譙昌曰晉武帝名炎後一年而受禪此炎興之兆也

令諸軍皆不得戰

退還漢樂二城魏興太守劉欽趣子午谷諸軍數道

平行至漢中監軍王含守樂城護軍蔣斌守漢城兵

各五千會使護軍荀愷前將軍李輔各統萬人圍漢

樂城會經過西出陽安口使護軍胡烈等行前攻破

關城得庫藏積穀維自沓中還至陰平合集士衆欲

赴關城未到聞其已破退趣白水

今隆慶府陰平縣漢白水縣也

與

翼化等合守劔閣拒會餘見通鑑

史容曰鄧艾遣金城太守楊吹詣甘

松及艾於潞川口今甘松嶺在松州嘉城縣似與沓中相近水經注強水出陰平西北強山一曰強川今甘松又在潞川之西蓋松州界也劔閣在隆慶府劔門縣水經注小劔戍去大劔戍三十里連山絕險飛閣

相連

魏司馬昭自為相國晉公加九錫

以魏紀修

癸卯魏立皇后

卞氏

以魏紀修

鍾會併將諸葛緒軍鄧艾鑿陰平道破漢衛

將軍諸葛瞻於綿竹瞻及子尚死之十一月漢主降北

地王諶死之姜維等皆降

以魏紀蜀傳修

解題曰艾至陰平

晉春秋三十國春秋云陰平景谷按今文州漢陰平道也樂史云隆

慶陰平宋始置伐蜀時未有也

簡選精銳欲從漢德陽入江油

今龍州縣

左擔道

自文州界青塘嶺至龍州一百一十五里自州南行為左擔路言不得右肩也

詣綿

竹趣成都會遣將軍田章等從劔閣西徑出江油未至百里章先破蜀伏兵三校艾自陰平道行無人之地七百餘里鑿山通道造作橋閣山高谷深至為艱

險又糧將匱瀕於危殆艾以氈自裹推轉而下將士
攀木緣崖魚貫而進先登至江油蜀守將馬邈降瞻
自涪還綿竹艾大破之斬瞻及尚書張遵等進軍到
雒後主使羣臣會議或以為蜀之與吳本為和國宜
可奔吳或以南中七郡朱提越嵩牂柯雲南興古建寧永昌斗絕易以
自守宜可奔南光祿大夫譙周以為自古以來無寄
他國為天子者今若入吳國亦當臣服且治政不殊
則大能吞小魏能并吳吳不能併魏明矣苟為稱臣

為小孰與為大再辱之耻何與一辱且若欲奔南則
當早為之計然後可今大敵已近禍敗將及羣小之
心無可保恐發足之日其變不測何至南之有乎或
曰今艾已不遠恐不受降如之何周曰方今東吳未
賓事勢不得不受受之後不得不禮若陛下降魏魏
不裂土以封陛下者周請身詣京都以古義爭之後
主猶疑於入南周上疏遂從周策餘見通鑑孫盛曰禪
雖庸主實無桀紂之酷戰雖屢北未有土崩之亂縱

不能君臣固守皆城借一自可退次東鄙以思後圖
是時羅憲以重兵據白帝霍弋以強卒鎮夜郎蜀土
險狹山水峻隔絕岩激湍非步卒所涉者若悉收舟
楫保據江州徵兵南中乞師東國如此則姜廖五將
自然雲從吳之三師承命電赴夫何投寄之無所而
慮於必亡耶且屈伸有會情勢代起何為匆匆遽自
囚虜下堅壁於敵人致斫石之至恨哉葛生有云事
之不濟則已耳安能復為之下壯哉斯言可以立懦

夫之志矣禪既闇主周實駑臣方之申包田單范蠡

大夫種不亦遠乎

袁暉曰方鄧艾以萬人入江油之危險鍾會以二十餘萬衆留劍閣

而不得進三軍之士已饑艾雖勝克使劉禪數日漢不降則二將之軍難以反矣故功業如此之難也

亡上距劉備即漢中王位二主四十五年

吳罷兵

以通鑑修

魏攻吳五谿武陵太守鍾離牧平之

以呂祖謙

標目修

十二月壬子魏分益州為梁州

以魏紀修

解題曰分廣漢巴涪陵以北諸郡為梁州治沔陽縣

李繪曰禹貢華陽黑水惟梁州其山川有岷蔡蒙江

沱皆在今成都府路蓋成都則古梁州之域漢改益州魏分益州置梁州益州治成都梁州治南鄭自此專謂漢中為梁州成都失梁州本名

已卯魏以鄧艾為太尉鍾會為司徒

以通鑑修

魏皇太后殂

以通鑑修

魏元皇帝咸熙元年

吳景皇帝永安七年

春正月

歸命侯孫皓元興元年

魏檻車徵鄧艾晉公昭以其主如長安衛瓘執艾鍾會

反衆誅之瓘殺艾二月丙辰魏主還

以魏紀通鑑修

解題曰會十五日至明日悉請護軍郡守牙門騎督

以上及蜀之故官為太后發喪於蜀朝堂矯太后詔

使會起兵廢司馬昭

本文作文王

皆班示坐上人使下議

訖書版署置更所親信代領諸軍所請羣官悉閉着

益州諸曹屋中於是士卒思歸內外騷動會留瑾謀

議乃書版云欲殺胡烈等舉以示瑾瑾不許因相疑

貳瑾如廁見胡烈故給使使宣語三軍言會反會逼

瑾定議經宿不眠各橫刀膝上在外諸軍已潛欲攻

會瓘既不出未敢先發會使瓘慰勞諸軍瓘心欲去

且堅其意曰卿三軍之主宜自行會曰卿監司

監司之名

見於此且先行吾當後出瓘便下殿會悔遣之使呼瓘

瓘辭眩疾動詐仆地比出閣數十信追之瓘至外廨

服鹽湯大吐瓘素羸便似困篤會遣所親人及醫

視之皆言不起會由是無所憚及暮門閉瓘作檄宣

告諸軍諸軍並已唱義凌旦共攻會會率左右距戰

諸將擊敗之唯帳下數百人隨會繞殿而走盡殺之

瓘於是部分諸將羣情肅然

魏紀詔曰鍾會構亂集征行將士却以兵威始

吐姦謀逼脅衆人下議莫不驚懾相國左司馬夏侯
和騎士曹屬朱撫時使成都中領軍司馬賈輔郎中
羊琇各參會軍事和琇撫皆抗節拒會臨危不顧輔
語散將王起說會凶暴欲盡殺將士又云相國已率
三十萬衆西討欲以稱張形勢感激衆心起以餘見
輔言宣語諸軍遂使將士益懷奮勵宜加寵顯

通鑑

吳遣將軍陸抗等圍巴東

以吳傳修

解題曰羅憲所將不過三千人加以病者大半步協
陸抗之兵奚翅十倍協不足道也而抗亦不能辨此

耶蓋抗專以西陵為重魏兵既在西陵此抗之所以速退也事見通鑑

三月己卯魏晉公昭自進王爵

以魏紀修

南中六郡降魏

以通

鑑修

丁亥魏封漢主劉禪為安樂公

以魏紀修

夏五月庚申魏

復五等爵

以魏紀修

甲戌魏改元

以魏紀修

魏攻吳西陵以救巴

東秋七月吳師退

以吳傳修

魏晉王昭使司空荀愷定禮儀

中護軍賈充正法律尚書僕射裴秀議官制太保鄭冲

裁之

以通鑑修

解題曰按晉志傳文帝命荀顗因魏代前事撰為新
禮參考古今更其節文羊祐任愷庾峻應貞並共刊
定成百六十五篇奏之賈充定法律令與太傅鄭冲
等十四人典其事就漢九章增十一篇仍其族類正
其體號律合二十篇六百二十條二萬七千六百五
十七言律令合二千九百二十六條十二萬六千三
百言六十卷泰始三年表上秀改官制議立五等之
爵

吳分交州置廣州

以吳傳修

吳主休殂尊皇后為皇太后濮

陽興驃騎將軍張布迎烏程侯皓即皇帝位改元

以吳傳修

解題曰不俟踰年改元

八月庚寅魏中撫軍司馬炎副相國事九月戊午自為

撫軍大將軍

以魏紀修

吳主貶皇太后為景皇帝后追謚父和

為帝母何氏為皇太后

以吳傳修

冬十月魏遣使聘吳

以通鑑修

丙午魏晉王昭以炎為世子

以魏紀修

吳封故太子璠為王

立妃滕氏為皇后十一月殺濮陽興及張布夷三族

以吳

傳是歲魏罷屯田官

以通鑑修

解題曰以均政役諸典農皆為太守都尉皆為令長

大事記續編卷二十三